

2 TESARONAIKA

Poruva Tesaronaikaaqinaahuani nraakiaraa qara vara kyora

Iesusira qati vara sivuma kyovaro nyaamwuni uro varuvaro 21 ihive nritarovaro Poruva mwaa quara qara ntumwa tora. Tesaronaikaaqi varuhua mpo uhua Karaisiva qaiqaa tumuani entara vekya variqata kyaiqa qaqlira kyeta qumina varuvaro mwia kyaara Poruva mwihuara kepukyaqama kyero tiqaro, Kyaiqa varaqi viqata Iesusira vekya variate, tura. Mwihuara kyaiqa varaaate timwa kyero mwaa quara qara ntumwa tora.

¹ Nte Poruvama. Ntevata, Sairaasivavata, Timotivavata, tire nramwu nkye Kotiranivata, Iesusi Karaisiranivata, Tesaronaikaaqi varia nraakyenorahua nkyinima qara mwaa vara kyeta.

² Tiri tiqova Kotivavata, tiri vunyaa vaisi Karaisivavata, nkyi kyuqema nyataivaro nkyi mwutukyaqitairo qihakya hi varirata variata.

Karaisiva uro ntantero tumu variqaro ko qian-inranra tura

³ Ni kata pakya tuaavo, tire nkyiara rieqata mpo enta mpo enta Kotirara kyuqeve qiarava nraahu vaihata varunanra. Nkye Karaisirara qutaave timwa kyeta mwiaqaatai mwianra riemwaqi viqata kepukyaqamaqi vi variarara tita, tire qiomma Kotirara kyuqeve qiananra. Nanrianra nanrianra mwutukya vahiva nkyi

mpoqiaavata vahirara tita, tire qiomaa Kotirara kyuqeve qiananra.

4 Nkye mwitaamaqita vi variarara tita, tire Kotira nraakye qora mpo hiahua utaqaa variqata nkyi nyutu tuaahere varunanra. Nkye Iesusira nraakye qora variavata mwia kyaara mpohua nkyi qoraqama nyate variavata nkye nronra muaanra vareqata hia qoriri hiraitita, kepukyaqama kye Karaisirara riemwaqi vi variarara tita, tire nkyi nyutu tuaahere varuro.

5 Nkye Karaisira kyaara muaanra varaqi quara Kotiva hia taunru kyaananro. Kotiva nraakye qora qua avuqavu hi variva varihatara tita, nkye Karaisirara riemwaqi viqata nronraqama kye muaanra varaqi vivaro Kotiva nkyiara, Nkye ni nraakye qorave. Nkye ni mwatuqyaqi qiomaa nrivarave, qiananro. Nkye Kotira mwatuqyaqi vihuara titama, nkye mwaa entara muaanrave, nriqa vi inraikyarave, vareta.

6 Kotiva avuqavuma kyero qua rie variva. Nkyi uaqiamma nyateta muaanra nkyiqa vatehua vari-varo Kotiva mwihua nkyiarivata uaqiamma nyatero muaanra mwihuqaqa vataananro.

7-8 Nkye muaanra varaqi vi varivaro ekyaa entaqaa nkyiqaataivata, tiriqaataivata, muaanra vara kyairaro vuvuatama viraqe variananra. Ekyaa entaqaa tiri vunyaa vaisi Iesusiva nyaamwusairo nai nyaamwunyaahua kepukyanramwuvata sita varero mwihua kyapata qovarama viro qia nronraqama kyero itaaninravata tumuananro. Mwi entara mwiva Kotirara hia rie nraakye qorahuave, Iesusi

Karaisira quara qumina quave ti nraakyे qorahuave, mwihua rirero qovara hiananro.

⁹ Mwiva qovarama viro mwi nraakyе qorahua ri ntuquti hiqaro titairata nyianrani nkyiariaraa uro variqata ekyaa enta uaqama vita variqata hiama tiri vunyaa vaisi Jesusira kepukyा okyara taqevara.

¹⁰ Mwi entara Iesusiva tuminranro mwia peqa okyaravanto qoqaa vahirata Jesusirara qutaave ti nraakyе qorahua mwia nrutu tuaahera kyeta mwia mwahuta timwa mwatevara. Tire Jesusirara nkyi timwa nyunrata nkye qutaave qiarara tita, nkyevata mwi entara mwi nraakyе qorahua kyapata varivara.

¹¹ Tire mwianra rieqatama Kotirara nkyi kyaahqama nyataarive titama, mpo enta mpo enta mwianra aakyara nte varunanra. Aanra kyuqer-aqaa quate tiro, Kotiva nkyi nyaanrama taira. Aanra mwiaqaa kyuqema kye quate tita, tire Kotirara aakyara nte varunana. Nkye Karaishara kepukyaqama kye riemwaqi viqata kyuqe kyaiqa nraahu vararerera uti varivaro Kotiva nkyi kepukyा nyinrata nkye qio mwi kyaiqara mwi kyaiqara vareqa variate.

¹² Nkye mwitaamaqi vivaro tiri vunyaa vaisi Iesusi Karaishira nrutuvanto viriraqaa nri viraro mwiva nkyita nrutuvata tuaaheraari. Kotivavata, tiri vunyaa vaisi Iesusi Karaishivavata, nkyi kyuqema nyatairata nkye qiomma mwitaamaqi vivara.

2

Anoma kyero Kotira qua nteqa kyero qora

kyaiqa uti varianikurara tura

¹ Iesusi Karaisiva tiri vunyaa vaisivanto tiri ntuvantua hirero tumuan entarara nkyi timwa nyinrenra. Nte nkyiara po,

² qati hia mpohua api qua tira riaate tuqo. Vaisi mponramwuvanto unra tiqata, Tiri vunyaa vaisivanto uro ntante tumuanri entava vaakya qovaramama viho, ti variara. Nkye aatu hiqata mwihua quara nronraqama kyeta rievora. Hia mwi entava nrintaiho. Taisairo mwi quava qovarama vihatave mwihua api qua ti variavo? Mpowanto unra tiqaro, Kotiva tihana riaurave, tihatave mwitaa ti variavo? Mpowanto tiriara, Mwihua mwi quara mwitaa qiarave. Mwihua mwi quara qara ntumwa taarave, tihatave mwitaa ti variavo?

³ Hiama kyaivaro vaisi mpovanto mpo qua mpo quaqotairo ekyara entara nkyi kumwaanri qari. Nraakiara mpo enta nraakyе qora airivanto Kotira qorrima mwate varivaro mpovanto Kotira qua nteqa kyaari vaisikuva qovarama viro variqiro viraro mwiaqatairo Karaisiva tumuan entava qio nriananro. Ekyaa mwi inraikyava nraante qovarama viro variqiro viraro mwi entava nriananro. Mwi entava hia nri ntaaninraqaa Kotira qua nteqa kyaari vaisiva nraante qovarama viro qora inraikyavanto variqiro viro Saataaninra mwatuqyaqi viro raupiri hiarivama variananro.

⁴ Kyai nte mwi vaisira qora kyaiqara nkyi timwa nyianri. Mwi vaisiva nraakiara qovarama viro nraakyе qoravanto mwanriqave ti inraikyarara qumina inraikyave tiro nraakyе qora-

vanto mpo inraikya nrutu tuaahere inraikyarara qumina inraikyave timwa kyero mwiva tiqaro, Nte mwi inraikyara mwi inraikyara nraatara kyauvave, timwa kyero uro Kotira nraamwuqi mwatakyaa viro variqaro nanrianra nte Kotivave qiananro.

⁵ Nkye hiave mwi quara nraatoqi vateta? Nte haaru nkyi kyapata variqana mwi quara mwi quara nkyi timwa nyiavarama.

⁶ Qora vaisi Kotira qua nteqa kyaari vaisiva qamwanrama qovara hiankyorave tiro, mpo inraikyavanto mwia antua taira. Nte mwi inraikyarara nkyi timwa nyuqata nkye mwi quara ntapihi kyaara. Kotiva mwi vaisirara qovara hiante qiani entarama Kotira qua nteqa kyaari vaisiva qovara hiananro.

⁷ Mwaa entara Kotira qua nteqa kye variahua hia qoqaa variqata uaquia hi kyaiqara uti variavo. Mwihua uqeta vi variqata uaquia hi kyaiqara uti variavaro nraakiara mwihua kyaiqa antua taariva ekyaara viro mwia mwaanrainranro

⁸ mwiaqatairo qamwanrama kyero Kotira qua nteqaari vaisiva qovara hiananro. Mwi vaisiva qovarama viro qoqaa variqaro mwaaqu kyaiqa utuqiro quananro. Mwiva mwaaqu vehi kyaiqa mwia utuqiro viraro mwiaqatairo tiri vunyaava, Iesusiva qovarama viro mwia peqa okyaravanto takyuqi vairaro mwiva tumu nai nroqitairo vuata kyairaro mwi vaisiva taiqa quananro.

⁹ Kyai nte mwi vaisira qora kyaiqara mpoqiatava nkyi timwa nyianri. Kotira qua nteqa kyaari vaisiva nri ntero qovarama viro variraro

Saataaniva mwia kepukya mwinranro mwiva nraakye qora unra qua timwa nyiqiro viqaro mwihuara api aanraqaa viqata nai mwianra quataa vaisive qiate tiro, mwiva mpo kyaiqa mpo kyaiqa nronra kyaiqa hia taqe kyaiqara varaqiro quananro.

10 Mwiva mwitaamaqiro virata Saataaninra mwatuqyaqi virera hi nraakye qorahua vari-varo mwiva mpo qua mpo qua unra qua mwihua timwa nyiqiro virata mwihua mwia quara quataavema tivara. Mwi nraakye qorahua Karaisira quataa quara hia mwutukya vahata variarara titi, mwia kyaara mwihua Saataaninra mwatuqyaqi vihua varivaro Kotiva hiama qio mwihua huvantu nyataaanano.

11 Mwia kyaara Kotiva mwihua su nyaato vara qumimaqama kyairata mwihua mwitaama variqata unra quara quataa quave tivara.

12 Ekyaa nraakye qoravanto Kotira quataa quara unra quave timwa kyeta uaquia hi kyaiqarara qamwate varihua varivaro Kotiva mwihua ko timwa nyatairata mwihua Saataaninra mwatuqyaqi vivara.

Kotiva nkyi nai kyaama torara tura

13 Ni kata pakya tuaavo, tire mpo enta mpo enta nkyiara rieqata Kotirara kyuqeve timwaqi virera. Tiri vunyaa vaisi Karaisira mwutukyavanto nkyiara vahata nkye variavo. Haaru nkye hia varu entara Kotiva nkyiara nte mwihua huvantu nyatarerave timwa kyero nkyi nai kyaama torara tiro, Kotira mwanraquravanto nkyi kepukya nyihata nkye Kotira nraakye qora

variara. Karaisira qutaa quara nkye qutaave tiqata variarara tita, nkye Kotira nraakyе qora variarama.

¹⁴ Tiri vunyaa vaisivanto Iesusi Karaisiva nyaamwuni uro kepukyavanto variharo Kotiva nkyiaravata nronraqama vita Karaisiravata variqi quate tiro, nkyi nyaanrama taira. Nkye Kotiva nkyi nyaanrama tai quara riaate tita, tire Karaisira mwakyaakya nkyi timwa nyunanza.

¹⁵ Ni kata pakyaa tuaavo, mwi quara rieqatama nkyevata kepukyaqama kyeta variata. Tire nkyi timwa nyuna quara mwia nraahu tuqara kyeta tutaaata. Nroqitaive, qaraqitaive, nkyi timwa nyuna quara tuqara kyeta tutaaata.

¹⁶⁻¹⁷ Tiri vunyaa vaisivanto Iesusi Karaisivata, Kotiva tiri tiqovavata, tiriara mwutukya vaihata varunanra. Tiriara mpo enta mpo enta kepukyaqama kye variqata mwiaavata uro vari entara vekya variate tiro, Kotiva tiri kyuqema timwa taira. Kyaivaro mwiva nkyi mwutukya kepukyaqama nyatairata nkye kepukyaqama vi variqata kyuqe kyaiqa nraahu varaqi viqata kyuqe qua nraahu timwaqi viqata variata.

3

Poruva nkye tiriavaravata rieqata Kotirara aakyara ntaate tura

¹ Ni kata pakyaa tuaavo, nte ekyaara mpo qua nkyi timwa nyinrenra. Nkye Kotirara aakyara nte varivaro tiri vunyaa vaisi quavanto qamwanrama kyero viro nrinro hirata mpo mwatanaavanto mpo mwatanaavanto nkye qiantema kyeta

mwihiuavata mwi quarara qutaa qua nritare vahi
quarave qiata.

² Hia ekyaa nraakye qoravanto Karaisirara
qutaave ti variarara tita, nkye qaiqaavata Koti-
rara aakyara nte varivaro mwaaqu kyaiqave,
uaquia hi kyaiqarave, vare varihuaqitairo tiri
vaitutuma kyaari.

³ Tiri vunyaa vaisivanto nkyiara ekyaa enta rie
varivama variro. Saataaniva nkyi tu varaankyo
tiro, mwiva nkyi kepukyaqama nyatero nkyi
vaitutuma kyaananro.

⁴ Tire teta vunyaa vaisiara rieqatama nkyiara
mwutukya qihakya ihata mwitaama tita, Qioma
nkye tire nkyi timwa nyuna quaravata, qaiqaa
timwa nyiana quaravata, riemwaqita vivarave,
turo.

⁵ Tiri vunyaa vaisivanto Karaisiva nkyi
kyaahaqa hirata nkye Kotiva nkyiara mwutukya
vataani okyarara ntapihiata. Karaisiva
nkyi kyaahaqa hirata nkyevata mwiva nai
kepukyaqama kyero variqi vintema kyeta
kepukyaqama kye variqi quata.

*Haunri nkyiqitai mpo ihua qumina variqata hia
kyaiqa varevorave, tura*

⁶ Ni kata pakyaa tuaavo, tiri vunyaa vaisi Iesusi
Karaisira nrutu nteqatama tire mwaa quara
kepukyaqama kye nkyiara mwitaama tita, Nkye
taqaivaro nkyi sata sakyaam povanto hia kyaiqa
vararaitiro, mwiva tire nkyiara mwataama kye
kyaiqa varaate tiqata nkyi timwa nyuna quara
hia riaraitiro, qumina variqiro virera, nkye mwi
vaisira vitiqama taqaata.

⁷ Nkye ntapihi kyaara. Tire hurante hiataara vaihata nkye hininramwuvanto uaqia hi variavo. Tire nkyivata variqata hia qumina variavanana.

⁸ Tire nkyivata variqata hia nkyi kyara qumina vararaitita, munima kyeqata varaavananra. Tire nkyi muaanra nyianro tita, entaqivata iheravata toqaamwu tu kyeta kyaiqa varaqi viqata munima vara kyeta mwiaqo kyara nramwaqita quavanana.

⁹ Mwi entara tire nkyiqitai kyara nyaanruma kye nraanrava qio vahuvatavata tire hia mwitaa hiavanana. Nkye tiri kyaiqa taqeqlata tiri vataqi viqata tire hurante hiate tita, hia nkyiara kyararave, mwitaa inraikyarave, nyaanru qiavananra.

¹⁰ Tire nkyivata variqata nkyi qua mwaanra timwa nyiqata mwitaa qiavananrama. Hia kyaiqa varaataa hiari vaisiva hia kyara nraanrive, qiavananra.

¹¹ Tire riaurata nkyiqitai vaisi mpo hiahua hia kyaiqa vararaitita, mwihua qumina variqata mpohua kyaiqara nraahu airi qua tiqata qumina variara.

¹² Tiri vunyaa vaisi Iesusi Karaisira nrutuqaa tire qua vateqama mwi vaisihuara kepukyaqama kye tiqata, Hia qumina aanra nrohiraitita, mwata sata tirema kye variqata kyaiqa vara kyeqata kyara nramwaqi quate, turo.

¹³ Qio ni kata pakyaa tuaavo, hia qoririma kyeqa kyuqe kyaiqa varaqi quata.

¹⁴ Tire mwaaqi qara ntumwa tauna quarara mpovanto qumina quave qiankyora. Mpovanto mwaa quara hia riarerave tirata nkye mwi vaisira ntapihi kye taqeta mwia vitiqama taqeta

nraahumwa sata varivaro mwi vaisiva kyauruari.

¹⁵ Hia mwi vaisira nramwutaaqa hiraitita, nkye mwianra qata vakyaave tiqatama mwaateraqama kye mwianra ena quana aanranra mwia qaqlira kyaante qiata.

Ekyaara qua tura

¹⁶ Tiri vunyaa vaisivanto mwutukya qihakkyama nyate varivama variro. Mwiva nkyi kyaahaqa hirata nkye mpo kyaiqa mpo kyaiqa varaqi vivaro nkyi mwutukyavanto qihakky hi varirata variqi quata. Tiri vunyaa vaisivanto nkyivata variqiro virata nkye variqi quata.

¹⁷ Qio nkyi qua mwantarera nte ntenga kyauquqo ntenga nutu qara ntumwa tauqo: NTE PORUVAVE. Nte ntenga nutu qara ntumwa taura taqequatama nkye quataama Poruva tirini qara ntumwa tairave tivara.

¹⁸ Tiri vunyaa vaisivanto Iesusi Karaisiva nkyi kyuqemaqiro virata variqi quatema, tuqo.

**QARAAKYA QUA TIMWATORA
The New Testament in the Omwunra-Toqura (South
Tairora) Language of Papua New Guinea
Nupela Testamen long tokples Omwurna-Toqura long
Niugini**

copyright © 2000 Wycliffe Bible Translators, Inc.

Language: Omwunra-Toqura (South Tairora) (Tairora, South)

Dialect: Omwunra-Toqura

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 28 Dec 2024 from source files dated 31 Aug 2023

73e2f29d-4ca4-50e6-a471-722ac8ab5666